



文選卷第三十七

梁昭明太子蕭統撰

表上

薦禰衡表

孔文舉

臣聞洪水橫流帝思俾乂旁求四方以招賢俊
昔世宗繼統將弘祖業疇咨熙載群士響臻陛
下叡聖纂承基緒遭遇厄運勞謙日仄惟岳降
神異人並出竊見處士平原禰衡年二十四字
正平淑質貞亮英才卓犖初涉藝文升堂覩奧

目所一見輒誦於口耳所暫聞不忘於心性與
道合思若有神弘芊潛計安世默識以衡準之
誠不足怪忠果正直志懷霜雪見善若驚疾惡
若讎任座抗行史魚厲節殆無以過也鷲鳥累
百不如一鶚使衡立朝必有可觀飛辯騁辭溢
氣空涌解疑釋結臨敵有餘昔賈誼求試屬國
詭係單于終軍欲以長纓牽致勁越弱冠慷慨
前代美之近日路粹嚴象亦用異才擢拜臺郎
衡宜與爲比如得龍躍天衢振翼雲漢揚聲紫

微垂光虹蜺足以昭近署之多士增四門之穆
穆鈞天廣樂必有奇麗之觀帝室皇居必畜非
常之寶若衡等輩不可多得激楚陽阿至妙之
容掌技者之所貪飛兔騾褭絕足奔放良樂之
所急也臣等區區敢不以聞陛下篤慎取士必
須効試乞令衡以褐衣召見必無可觀采臣等
受面欺之罪

出師表

諸葛孔明

臣亮言先帝創業未半而中道崩殂今天下三

分益州罷弊此誠危急存亡之秋也然侍衛之
臣不懈於內忠志之士亡身於外者蓋遵先帝
之遇欲報之於陛下也誠宜開張聖聽以光先
帝遺德恢弘志士之氣不宜妄自菲薄引喻失
義以塞忠諫之路也宮中府中俱爲一體陟罰
臧否不宜異同若有作姦犯科及爲忠善者宜
付有司論其刑賞以昭陛下平明之治不宜偏
私使內外異法也侍中侍郎郭攸之費禕董
等此皆良實志慮忠純是以先帝簡拔以遺

下愚以爲宮中之事事無大小悉以咨之然後
施行必能裨補闕漏有所廣益也將軍向寵性
行淑均曉暢軍事試用於昔日先帝稱之曰能
是以衆議舉寵爲督愚以爲營中之事悉以諮
之必能使行陣和穆優劣得所也親賢臣遠小
人此先漢所以興隆也親小人遠賢士此後漢
所以傾覆也先帝在時每與臣論此事未嘗不
歎息痛恨於相靈也侍中尚書長史參軍此悉
貞亮死節之臣也願陛下親之信之則漢室之

隆可計日而待也臣本布衣躬耕於南陽苟全性命於亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之事由是感激遂許先帝以驅馳後值傾覆受任於敗軍之際奉命於危難之間爾來二十有一年矣先帝知臣謹慎故臨崩寄臣以大事也受命以來夙夜憂歎恐託付不效以傷先帝之明故五月度瀘深入不毛今南方已定兵甲已足當帥將三軍北定中原庶竭駑鈍攘除姦凶

興復漢室還於舊都此臣之所以報先帝而忠陛下之職分也至於斟酌規益進盡忠言則攸之權允之任也願陛下託臣以討賊興復之效不效則治臣之罪以告先帝之靈若無興德之言則戮允等以章其慢陛下亦宜自謀以咨諏善道察納雅言深追先帝遺詔臣不勝受恩感激今當遠離臨表涕泣不知所云

求自試表

曹子建

臣植言臣聞士之生世入則事父出則事君事

父尚於榮親事若貴於興國故慈父不能愛無
益之子仁君不能畜無用之臣夫論德而授官
者成功之君也量能而受爵者畢命之臣也故
君無虛授臣無虛受虛授謂之謬舉虛受謂之
尸祿詩之素餐所由作也昔二虢不辭兩國之
任其德厚也旦奭不讓燕魯之封其功大也今
臣蒙國重恩三世于今矣正值陛下升平之際
沐浴聖澤潛潤德教可謂厚幸矣而位竊東藩
爵在上列身被輕煖口厭百味目極華靡耳倦

絲竹者爵重祿厚之所致也退念古之受爵祿
者有異於此皆以功勤濟國輔主忠民今臣無
德可述無功可紀若此終年無益國朝將挂風
人彼已之譏是以上慙玄冕俯媿朱紱方今天
下一統九州晏如顧西尚有違命之蜀東有不
臣之吳使邊境未得稅甲謀士未得高枕者誠
欲混同宇內以致大和也故啓滅有扈而夏功
昭成克商奄而周德著今陛下以聖明統世將
欲卒文武之功繼成康之隆簡良授能以方叔

邵虎之臣鎮衛四境爲國爪牙者可謂當矣然而高鳥未挂於輕繳淵魚未懸於鉤餌者恐鈞射之術或未盡也昔耿弇不俟光武亟擊張步言不以賊遺於君父也故車右伏劍於鳴轂雍門刎首於齊境若此二子豈惡生而尚死哉誠忿其慢主而陵君也夫君之寵臣欲以除患興利臣之事君必殺身靜亂以功報主也昔賈誼弱冠求試屬國請係單于之頸而制其命終軍以妙年使越欲得長纓占其王羈致北闕此二

臣豈好爲夸主而耀世俗哉志或鬱結欲逞才力輸能於明君也昔漢武爲霍去病治第辭曰匈奴未滅臣無以家爲固夫憂國忘家捐軀濟難忠臣之志也今臣居外非不厚也而寢不安席食不遑味者伏以二方未剋爲念伏見先帝武臣宿兵年耆卽世者有聞矣雖賢不乏世宿將舊卒由習戰也竊不自量志在效命庶立毛髮之功以報所受之恩若使陛下出不世之詔效臣錐刀之用使得西屬大將軍當一校之隊

若東屬大司馬統偏師之任必乘危躡險騁舟
奮驪突刃觸鋒爲士卒先雖未能禽權馘亮庶
將虜其雄率殲其醜類必效須臾之捷以滅終
身之愧使名挂史筆事列朝榮雖身分蜀境首
懸吳闕猶生之年也如微才不試沒世無聞徒
榮其軀而豐其體生無益於事死無損於數虛
荷上位而忝重祿禽息鳥視終於白首此徒圈
牢之養物非臣之所志也流聞東軍失備師徒
小衄輟食并餐奮袂攘衽撫劔東顧而心已馳

於天會矣臣昔從先武皇帝南極赤岸東臨滄
海西望玉門北出玄塞伏見所以行軍用兵之
勢可謂神妙矣故兵者不可豫言臨難而制變
者也志欲自效在明時立功在聖世每覽史籍
觀古忠臣義士出一朝之命以殉國家之難身
雖屠裂而功銘著在景鍾名稱垂在竹帛未嘗
不拊心而歎息也臣聞明主使臣不廢有罪故
奔北敗軍之將用秦魯以成其功絕纓盜馬之
臣赦楚趙以濟其難臣竊感先帝早崩威王弃

世臣獨何人以堪長久常恐先朝露填溝壑墳
土未乾而身名並滅臣聞騏驎長鳴伯樂昭其
能盧狗悲號韓國知其才是以效之齊楚之路
以逞千里之任試之狡兔之捷以驗搏噬之用
今臣志徇馬之微功竊自惟度終無伯樂韓國
之舉是以於邑而竊自痛者也夫臨博而企竦
聞樂而竊抃者或有賞音而識道也昔毛遂趙
之陪隸猶假錐囊之喻以寤主立功何況巍巍
大魏多士之朝而無慷慨死難之臣乎夫自衒
自媒者士女之醜行也干時求進者道家之明
忌也而臣敢陳聞於陛下者誠與國分形同氣
憂患共之者也冀以塵露之微補益山海螢燭
末光增暉日月是以敢冒其醜而獻其忠知必
爲朝士所笑聖主不以人廢言伏惟陛下少垂
神聽臣則幸矣

求通親親表

曹子建

臣植言臣聞天稱其高者以無不覆地稱其廣
者以無不載日月稱其明者以無不照江海稱

其大者以無不容故孔子曰大哉堯之爲君惟天惟大惟堯則之夫天德之於萬物可謂弘廣矣蓋堯之爲教先親後疏自近及遠其傳曰克明峻德以親九族九族既睦平章百姓及周之文王亦崇厥化其詩曰刑於寡妻至於兄弟以御于家邦是以雍雍穆穆風人詠之昔周公弔管蔡之不咸廣封懿親以蕃屏王室傳曰周之宗盟異姓爲後誠骨肉之恩爽而不離親親之義是在敦固未有義而後其君仁而遺其親者

也伏惟陛下咨帝唐欽明之德體文王翼翼之仁惠洽椒房恩昭九親群臣百寮番休遞上執政不廢於公朝下情得展於私室親理之路通慶弔之情展誠可謂恕已治人推惠施恩者矣至於臣者人道絕緒禁固明時臣竊自傷也不敢乃望交氣類脩人事叙人倫近且婚媾不通兄弟永絕吉凶之問塞慶弔之禮廢恩絕之遺甚於路人隔閼之異殊於胡越今臣以一切之制永無朝覲之望至於注心皇極結情紫闥神

明知之矣然天實爲之謂之何哉退省諸王常有戚戚具爾之心願陛下沛然垂詔使諸國慶問四節得展以叙骨肉之歡恩全怡怡之篤義妃妾之家膏沐之遺歲得再通齊義在貴宗等惠在百司如此則古人之所歎風雅之所詠復存於聖世矣臣伏自惟省無錐刀之用及觀陛下之所拔授若以臣爲異姓竊自料度不後於朝士矣若得辭遠游載武弁解朱組佩青紱駟馬奉車趣得一號安宅京室執鞭珥筆出從華

蓋入侍輦轂承答聖問拾遺左右乃臣丹情之至願不離於夢想者也遠慕鹿鳴君臣之宴中詠棠棣匪他之誠下思伐木友生之義終懷蓼莪罔極之哀每四節之會塊然獨處左右唯僕隸所對唯妻子高談無所與陳發義無所與展未嘗不聞樂而拊心臨觴而歎息也臣伏以爲犬馬之誠不能動人譬人之誠不能動天崩城隕霜臣初信之以臣心况徒虛語耳若葵藿之傾葉太陽雖不爲之迴光終向之者誠也臣竊

自比葵藿若降天地之施垂三光之明者寔在
陛下臣聞文子曰不爲福始不爲禍先今之否
隔友于同憂而臣獨唱言者何也竊不願在聖
代使有不蒙施之物必有慘毒之懷故栢舟有
天只之怨谷風有弃予之歎伊尹耻其君不爲
堯舜孟子曰不以舜之所以事堯事其君者不
敬其君者也臣之愚蔽固非虞伊至於欲使陛
下崇光被時雍之美宣緝熙章明之德者是臣
悽悽之誠竊所獨守寔懷鶴立企佇之心敢復

陳聞者冀陛下儻發天聰而垂神聽也

讓開府表

羊叔子

臣枯言臣昨出伏聞恩詔拔臣使同台司臣自
出身以來適十數年受任外內每極顯重之地
常以智力不可疆進恩寵不可久謬夙夜戰慄
以榮爲憂臣聞古人之言德未爲衆所服而受
高爵則使才臣不進功未爲衆所歸而荷厚祿
則使勞臣不勸今臣身託外戚事遭運會誠在
過寵不患見遺而猥超然降發中之詔加非次

之榮臣有何功可以堪之何心可以安之以身
誤陛下辱高位傾覆亦尋而至願復守先人弊
廬豈可得哉違命誠忤天威曲從即復若此蓋
聞古人申於見知大臣之節不可則止臣雖小
人敢緣所蒙念存斯義今天下自服化已來方
漸八年雖側席求賢不遺幽賤然臣等不能推
有德進有功使聖聽知勝臣者多而未達者不
少假令有遺德於版築之下有隱才於屠釣之
間而令朝議用臣不以爲非臣處之不以爲愧

所失豈不大哉且臣忝竊雖久未若今日兼文
武之極寵等宰輔之高位也臣所見雖狹據光
祿大夫李喜秉節高亮正身在朝光祿大夫魯
芝絜身寡欲和而不同光祿大夫李胤莅政弘
簡在公正色皆服事華髮以禮始終雖歷內外
之寵不異寒賤之家而猶未蒙此選臣更越之
何以塞天下之望少益日月是以誓心守節無
苟進之志今道路未通方隅多事乞留前恩使
臣得速還屯不爾留連必於外虞有關臣不勝

憂懼謹觸冒拜表惟陛下察匹夫之志不可以奪

陳情表

李令伯

臣密言臣以險釁夙遭閔凶生孩六月慈父見背行年四歲舅奪母志祖母劉愍臣孤弱躬親撫養臣多疾病九歲不行零丁孤苦至于成立既無叔伯終鮮兄弟門衰祚薄晚有兒息外無朞功彊近之親內無應門五尺之童煢煢獨立形影相弔而劉夙嬰疾病常在牀蓐臣侍湯藥

未曾廢離逮奉聖朝沐浴清化前太守臣逵察臣孝廉後刺史臣榮舉臣秀才臣以供養無主辭不赴會詔書特下拜臣郎中尋蒙國恩除臣洗馬猥以微賤當侍東宮非臣隕首所能上報臣具以表聞辭不就職詔書切峻責臣逋慢郡縣逼迫催臣上道州司臨門急於星火臣欲奉詔奔馳則劉病日篤欲苟順私情則告訴不許臣之進退實爲狼狽伏惟聖朝以孝治天下凡在故老猶蒙矜育况臣孤苦特爲尤甚且臣少

仕僞朝歷職卽署本國宦達不矜名節今臣亡國賤俘至微至陋遇蒙拔擢寵命優渥豈敢盤桓有所希冀但以劉日薄西山氣息奄奄人命危淺朝不慮夕臣無祖母無以至今日祖母無臣無以終餘年母孫二人更相爲命是以區區不能廢遠臣密今年四十有四祖母劉今年九十有六是臣盡節在陛下之日長報劉之日短也烏鳥私情願乞終養臣之辛苦非獨蜀之人士及二州牧伯所見明知皇天后土實所共鑒

願陛下矜愍愚誠聽臣微志庶劉僥倖保卒餘年臣生當墮首死當結草臣不勝犬馬怖懼之情謹拜表以聞

謝平原內史表

陸士衡

陪臣陸機言今月九日魏郡太守遣兼丞張含賣板詔書印授假臣爲平原內史拜受祗竦不知所裁臣本出自敵國世無先臣宣力之效才非丘園耿介之秀皇澤廣被惠濟無遠擢自羣萃累蒙榮進入朝九載歷官有六身登三閣官

成兩宮服冕乘軒仰齒貴游振景拔迹顧邈同
列施重山岳義足灰沒遭國顛沛無節可紀雖
蒙曠盪臣獨何顏俛首頓膝憂愧若厲而橫爲
故齊王冏所見枉陷誣臣與衆人共作禪文幽
執囹圄當爲誅始臣之微誠不負天地倉卒之
際慮有逼迫乃與第雲及散騎侍郎袁瑜中書
侍郎馮熊尚書右丞崔基廷尉正顧榮汝陰太
守曹武思所以獲免陰蒙避迴崎嶇自列片言
隻字不關其間事蹤筆跡皆可推校而一朝翻

然更以爲罪最爾之生尚不足矣區區本懷實
有可悲畏逼天威卽罪惟謹鉗口結舌不敢上
訴所天莫大之釁日經聖聽肝血之誠終不一
聞所以臨難慷慨而不能不恨恨者唯此而已
重蒙陛下愷悌之宥迴霜收電使不隕越復得
扶老攜幼生出獄戶懷金拖紫退就散輩感恩
惟咎五情震悼跼天躋地若無所容不悟日月
之明遂垂曲照雲雨之澤播及朽瘁忘臣弱才
身無足采哀臣零落罪有可察苟削丹書得夷

平民則塵洗天波謗絕衆口臣之始望尚未至
是猥辱大命顯授符虎使春枯之條更與秋蘭
垂芳陸沉之羽復與翔鴻撫翼雖安國免徒起
紆青組張敞亡命坐致朱軒方臣所荷未足爲
泰豈臣蒙垢含吝所宜忝竊非臣致宗夷族所
能上報喜懼參并悲慙哽結拘守常憲當便道
之官不得束身奔走稽顙城闕瞻係大衢馳心
輦轂臣不勝屏營延仰謹拜表以聞

勸進表

劉越石

建興五年二月癸未朔十八日辛丑使持節散
騎常侍都督河北并冀幽三州諸軍事領護軍
匈奴中郎將司空并州刺史廣武侯臣琨使持
節侍中都督冀州諸軍事撫軍大將軍冀州刺
史左賢王渤海公臣匹磾頓首死罪上書臣琨
臣匹磾頓首頓首死罪死罪臣聞天生蒸民樹
之以君所以對越天地司牧黎元聖帝明王鑒
其若此知天地不可以乏饗故屈其身以奉之
知黎元不可以無主故不得已而臨之杜稷時

難則戚藩定其傾郊廟或替則宗誓纂其祀所以弘振遐風式固萬世三五以降靡不由之臣現臣匹磾頓首頓首死罪死罪伏惟高祖宣皇帝肇基景命世祖武皇帝遂造區夏三葉重光四聖繼軌惠澤侔於有虞十年過於周氏自元康以來艱禍繁興末嘉之際氛厲彌昏宸極失御登遐醜裔國家之危有若綴旒賴先后之德宗廟之靈皇帝嗣建舊物克甄誕授欽明服膺聰哲玉質幼彰金聲夙振豕宰攝其綱百辟輔

其治四海想中興之美群生懷來蘇之望不圖天不悔禍大災荐臻國未忘難寇害尋興逆胡劉曜縱逸西都敢肆犬羊陵虐天邑臣等奉表使還仍承西朝以去年十一月不守主上幽劫復沉虜廷神器流離再辱荒逆臣每覽史籍觀之前載厄運之極古今未有苟在食土之毛含氣之類莫不叩心絕氣行號巷哭況臣等荷寵三世位厠鼎司承問震惶精爽飛越且悲且惋五情無主舉哀朔垂上下泣血臣現臣匹磾頓

首頓首死罪死罪臣聞昏明迭用否泰相濟天命未改歷數有歸或多難以固邦國或殷憂以啓聖明是以齊有無知之禍而小白爲五伯之長晉有驪姬之難而重耳主諸侯之盟社稷靡安必將有以扶其危黔首幾絕必將有以繼其緒伏惟陛下玄德通於神明聖姿合於兩儀應命世之期紹千載之運夫符瑞之表天人有徵中興之兆圖讖垂典自京畿隕喪九服崩離天下蹶然無所歸懷雖有夏之遺夷羿宗姬之離

大戎蔑以過之陛下撫寧江左奄有舊吳柔服以德伐叛以刑抗明威以攝不類伏大順以肅宇內純化旣敷則率土宅心義風旣暢則遐方企踵百揆時序於上四門穆穆於下昔少康之隆夏訓以爲美談宣王之興周詩以爲休詠況茂勲格於皇天清輝光於四海蒼生顛然莫不欣戴聲教所加願爲臣妾者哉且宣皇之術惟有陛下億兆攸歸曾無與二天祚大晉必將有主主晉祀者非陛下而誰是以邇無異言遠無

異望謳歌者無不吟詠微猷獄訟者無不思在
聖德天地之際既交華裔之情允洽一角之獸
連理之木以爲休徵者蓋有百數冠帶之倫要
荒之衆不謀而同辭者動以萬計是以臣等敢
考天地之心因函夏之趣味死以上尊號願陛
下存舜禹至公之情狹巢由抗矯之節以社稷
爲務不以小行爲先以黔首爲憂不以克讓爲
事上以慰宗廟乃顧之懷下以釋溥天傾首之
望則所謂生繁華於枯萸育豐肌於朽骨神人

獲安無不幸甚臣琨臣匹磾頓首頓首死罪死
罪臣聞尊位不可久虛萬機不可久曠虛之一
日則尊位以殆曠之浹辰則萬機以亂方今鍾
百王之季當陽九之會狡寇窺窬伺國瑕隙齊
人波蕩無所繫心安可以廢而不恤哉陛下雖
欲逡巡其若宗廟何其若百姓何昔惠公虜秦
晉國震駭呂卻之謀欲立子圉外以絕敵人之
志內以固闔境之情故曰喪君有君群臣輯穆
好我者勸惡我者懼前事之不忘後代之元龜

也陛下明並日月無幽不燭深謀遠慮出自胸
懷不勝犬馬憂國之情遲覩人神開泰之路是
以陳其乃誠布之執事臣等各忝守方任職在
遐外不得陪列闕庭共觀盛禮踴躍之懷南望
罔極謹上臣琨謹遣兼左長史右司馬臣溫嶠
主簿臣辟閭訓臣碑遣散騎常侍征虜將軍清
河太守領右長史高平亭侯臣榮劭輕車將軍
關內侯臣郭穆奉表臣琨臣匹碑等頓首頓首
死罪死罪

音釋

躒力角切空蒲羊即要鳥掃宜度作積頽作稅衄反
衍反蕃作蕃樓作樓莞作莞罔反恨作恨踏亦顛音

文選卷第三十七

文選卷第三十八

梁昭明太子蕭統撰

表下

為吳令謝詢求為諸孫置守冢人表

張士然

臣聞成湯革夏而封祀武王入殷而建宋春秋
征代則晉修虞祀燕祭齊廟夫一國為一人興
先賢為後愚廢誠仁聖所哀悼而不忍也故三
王敦繼絕之德春秋貴柔服之義昔漢高受命

追存六國凡諸絕祚一時並祀親與項羽對爭
存亡逮羽之死臨哭其喪將以位嘗侔尊力嘗
均勢雖功奪其成而恩與其敗且暴興疾顛禮
之若舊殘戮之尸乃以公葬若使羽位承前緒
世有哲王一朝力屈全身從命則楚廟不墮有
後可冀伏惟太晉應天順民武成止戈西戎有
卽序之人京邑開吳蜀之館興滅加乎萬國繼
絕接於百世雖三五弘道商周稱仁洋洋之美
未足以喻是以孫氏雖家失吳祚而族蒙晉榮

子弟量才比肩進取懷金侯服佩青千里當時
受恩多有過望臣聞春兩潤木自葉流根鳴鴉
恤功愛子及室故天稱罔極之恩聖有綢繆之
惠追惟吳僞武烈皇帝遭漢室之弱值亂臣之
彊首唱義兵先衆犯難破董卓於陽人濟神器
於甄井威震群狡名顯往朝栢王才武弱冠承
崇招百越之士奮鷹揚之勢西赴許都將迎幼
主雖元勳未終然至忠已著夫家積義勇之基
世傳扶危之業進爲狗漢之臣退爲開吳之主

而蒸嘗絕於三葉園陵殘於薪采臣竊悼之伏見吳平之初明詔追錄先賢欲封其墓愚謂二君並宜應書故舉勞則力輸先代論德則惠存江南正刑則罪非晉寇從坐則異世已輕若列先賢之數蒙詔書之恩裁加表異以寵亡靈則人望克厭誰不曰宜二君私奴多在墓側今爲平民乞差五人蠲其徭役使四時脩護頽毀掃除塋壟永以爲常

讓中書令表

庾元規

臣亮言臣凡庸固陋少無檢操昔以中州多故舊邦喪亂隨侍先臣遠庇有道爰客逃難求食而已不悟邀時之福遭遇嘉運先帝寵興垂異常之顧既眷同國士又申之婚姻遂階親寵累忝非服弱冠濯纓沐浴玄風頻繁省闈出領六軍十餘年間位超先達無勞被遇無與臣比小人祿薄福過災生止足之分臣所宜守而偷榮昧進日爾一日謗讟既集上塵聖朝始欲自聞而先帝登遐區區微誠竟未上達陛下踐祚聖

政維新宰輔賢明庶寮咸允康哉之歌實在至
公而國恩不已復以臣領中書則示天下以私
矣何者臣在陛下后之兄也姻婭之嫌實與骨
肉中表不同雖太上至公聖德無私然世之喪
道有自來矣悠悠六合皆私其姻者也人皆有
私則謂天下無公矣是以前後二漢咸以抑后
黨安進婚族危向使西京七族東京六姓皆非
姻黨各以平進縱不悉全決不盡敗今之盡敗
更由姻昵臣歷觀庶姓在世無黨在朝無援在

時植根之本輕也薄也苟無大瑕猶或見容至
於外戚憑託天地勢連四時根援扶踈重矣大
矣而財居權寵四海側目事有不允罪不容誅
身既招殃國爲之弊其故何耶直由婚媾之私
群情之所不能免故率其所嫌而嫌之在國是
以疏附則信姻進則疑疑積於百姓之心則禍
成重閨之內矣此皆往代成鑒可爲寒心者也
夫萬物之所不通聖賢因而不奪冒親以求一
才之用未若防嫌以明公道今以臣之才兼如

此之嫌而使內處心膂外揔兵權以此求治未
之聞也以此招禍可立待也雖陛下二相明其
愚款朝士百寮頗識其情天下之人何可門到
戶說使皆坦然耶夫富貴寵榮臣所不能忘也
刑罰貧賤臣所不能甘也今恭命則愈違命則
苦臣雖不達何事皆特違上自貽患責哉仰覽
殷鑒量已知敝身不足惜爲國取侮是以恹恹
屢陳卅款而微誠淺薄未垂察諒憂惶屏營不
知所厝以臣今地不可以進明矣且違命已久

臣之罪又積矣歸骸私門以待刑書願陛下垂
天地之鑒察臣之愚則雖死之日猶生之年矣

薦譙元彥表

桓元子

臣聞太朴旣虧則高尚之標顯道喪時昏則忠
貞之義彰故有洗耳投淵以振玄邈之風亦有
秉心矯跡以敦在三之節是故上代之君莫不
崇重斯軌所以篤俗訓民靜一流競伏惟大晉
應符御世運無常通時有屯蹇神州丘墟三方
圯裂兔豷絕響於中林白駒無聞於空谷斯有

識之所悼心大雅之所歎息者也陛下聖德嗣興方恢天緒臣昔奉役有事西土鯨鯢旣懸思宣大化訪諸故老搜揚潛逸庶武羅在昇浞之墟想王蠋在亡齊之境竊聞巴西譙秀植操貞固抱德肥遯揚清渭波在時皇極邁道道之會群黎蹈顛沛之艱中華有顧瞻之哀幽谷無遷喬之望凶命屢招奸威仍逼身寄虎吻危同朝露而能抗節玉立誓不降辱杜門絕跡不面僞庭進免龔勝亡身之禍退無薛方詭對之譏雖

園綺之棲商洛管寧之默遼海方之在秀殆無以過于今西土以爲美談夫旌德禮賢化道之所先崇表殊節聖喆之上務方今六合未康豺豕當路遺黎偷薄義聲不聞益宜振起道義之徒以敦流遜之敝若秀蒙蒲帛之徵足以鎮靜頽風執訓囂俗幽遐仰流九服知化矣

解尚書表

殷仲文

臣聞洪波振壑川無恬鱗驚飈拂野林無靜柯何者勢弱則受制在巨力質微則莫以自保在

理雖可得而言在臣寔所敢喻昔栢玄之世誠
復驅迫者衆至在愚臣罪實深矣進不能見危
授命忘身殉國退不能辭粟首陽拂衣高謝遂
乃宴安昏寵叨昧僞封錫文篡事曾無獨固名
義以之俱淪情節自茲兼撓宜其極法以判忠
邪鎮軍臣裕在復社稷大弘善貸行一戮在微
命申三驅在太信既惠之以首領復引之以繫
維在時皇輿否隔天人未恭用忘進退唯力是
視是以僂俛從事自同全人今宸極反正惟新

告始憲章既明品物思舊臣亦胡顏之厚可以
顯居榮次乞解所職待罪私門遣謝闕庭乃心
愧戀謹拜表以聞

爲宋公至洛陽謁五陵表

傅李友

臣裕言近振旅河湄揚旂西邁將伯舊京威懷
司雍河流遄疾道阻且長加以伊洛榛蕪津塗
久廢伐木通徑淹引時月始以今月十二日次
故洛水浮橋山川無改城闕爲墟宮廟隳頓鍾

簾空列觀宇之餘鞠爲禾黍塵里蕭條雞犬罕
音感舊永懷痛心在目以其月十五日奉謁五
陵墳塋幽淪百年荒翳天衢開泰情禮獲申故
老掩涕三軍悽感瞻拜之日憤慨交集行河南
太守毛脩之等既開翦荆棘繕脩毀垣職司既
備蕃衛如舊伏惟聖懷遠慕兼慰不勝下情謹
遣傳詔殿中中郎臣某奉表以聞

爲宋公求加贈劉前軍表

傅季友

聞崇賢旌善王化所先念功簡勞義深追遠
故司勲秉策在勤必記德之休明沒而彌著故
尚書左僕射前軍將軍臣劉穆之爰自布衣協
佐義始內竭謀猷外勤庶政密勿軍國心力俱
盡及登庸朝右尹司京畿敷讚百揆翼新大猷
頃戎車遠役居中作捍撫寧之勲實洽朝野識
量局致棟幹之器也方宣讚盛化緝隆聖世志
績未究遠邇悼心皇恩褒述班同三事榮哀旣
備寵靈已泰臣伏思尋自義熙草創艱患未弭

外虞既殷內難亦存時屯世故靡有寧歲臣以寡劣負荷國重實賴穆之匡翼之勲豈唯謹言嘉謀溢于民聽若乃忠規密謨潛慮帷幕造膝詭辭莫見其際事隔在皇朝功隱在視聽者不可勝記所以陳力一紀遂克有成出征入輔幸不辱命微夫人之左右未有寧濟其事者履謙居寡守之彌固每議及封爵輒深自抑絕所以勲高當年而茅土弗及撫事永念胡寧可昧謂宜加贈正司追甄土宇俾忠貞之烈不泯在身

後大賚所及未秩在善人臣契闊屯夷旋觀終始金蘭之分義深情感是以獻其乃懷布之朝聽所啓上合請付外詳議

為齊明皇帝作相讓宣城郡公第一表

任彥升

臣鸞言被臺司召以臣為侍中中書監驃騎大將軍開府儀同三司揚州刺史錄尚書事封宣城郡開國公食邑三千戶加兵五千人臣本庸才智力淺短太祖高皇帝篤猶子之愛降家人

之慈世祖武皇帝情等布衣寄深同氣武皇大
漸實奉語言雖自見之明庸近所蔽愚夫一至
徧識量已實不忍自固在綴衣之辰拒違在王
几之側遂荷顧託導揚末命雖嗣君弃常獲罪
宣德王室不造職臣之由何者親則東牟任惟
博陸徒懷子孟社稷之對何救昌邑爭臣之譏
四海之議在何逃責且陵土未乾訓誓在耳家
國之事一至於斯非臣之尤誰任其咎將何以
肅拜高寢虔奉武園悼心失圖泣血待旦寧容

復徵榮在冢恥宴安在國危驃騎上將之元勳
神州儀刑之列岳尚書古稱司會中書實管王
言且虛飾寵章委成禦侮臣知不愜物誰謂宜
但命輕鴻毛責重山岳存沒同歸毀譽一貫辭
一官不減身累增一職已黷朝經便當自同體
國不爲飾讓至在功均一匡賞同千室光宅近
甸奄有全邦隕越爲期不敢聞命亦願曲留降
鑒即垂順許鉅平之懇誠彌固永昌之丹慊獲
申乃知君臣之道綽有餘裕苟曰易昭敢守難

奪故可庶心弘議酌已親物者矣不勝荷懼屏
營之誠謹附某官某甲奉表以聞

爲范尚書讓吏部封侯第一表

任彦升

臣雲言被尚書召以臣爲散騎常侍吏部尚書
封霄城縣開國侯食邑千戶奉命震驚心顏無
措臣雲臣素門凡流輪翮無取進謝中庸退慙
狂狷固嘗鑽厲求學而一經不治篆刻爲文而
三冬靡就負書燕魏空殫菽粟躡僑齊楚徒知

貧賤既而分虎出守以囊被見嗤持斧作牧以
蕙以興謗赭衣爲虜見獄吏之尊除名爲民知
井曰之逸百年上壽既曰徒然如其誠說亦以
過半亂離斯瘼欲以安歸閉門荒郊再離寒暑
兼以東臯數畝控帶朝夕關外一區悵望鍾阜
雖室無趙女而門多好事祿微賜金而歡同娛
老折芟燔枯此焉自足陛下應期萬世接統千
祀三千景附八百不謀臣覺等離心功慙同德
泥首在顏輿棺未毀締構草昧敢叨天功獄訟

文選卷第三十八
謳歌示同民志而隆器大名一朝摠集顧已及
躬何以臻此政當以接開白水列宅舊豐忘捨
講之尤存諸公之費俯拾青紫豈待明經臣雲
夫銓衡之重關諸隆替遠惟則哲在帝猶難漢
魏以降達識繼軌雅俗所歸唯稱許郭拔十得
五尚曰北肩其餘得失未聞偶察童幼天機暫
發顧無足算在魏則毛玠公方居晉則山濤識
量以臣況之一何遼落齊季陵遲官方淆亂鴻
都不綱西園成市金章有盈笥之談華貂深不

足之歎草創惟始義存改作恭已南面責成斯
在豈宜妄加寵私以乏王事附蟬之飾空成寵
章求之公私授受交失近世侯者功緒參差或
足食關中或成軍河內或制勝帷幄或門人加
親或與時抑揚或隱若敵國或策定禁中或功
成野戰或盛德如卓茂或師道如栢榮或四姓
侍祀已無足紀五侯外戚且非舊章而臣之所
附唯在恩澤旣義異疇庸實榮乘儒者雖小人
貪幸豈獨無心臣本自諸生家承素業門無富

貴易農而仕乃祖玄平道風秀世爰在中興儀
刑多士位裁元凱任止牧伯高祖少連夙乘高
尚所富者義所乏者時薄宦東朝謝病下邑先
志不忘愚臣是庶且去歲冬初國學之老博士
耳今茲首夏將亞豕司雖千秋之一日九遷苟
爽之十旬遠至方之微臣未爲速達臣雖無識
唯利是視至於虧名損實爲國爲身知其不可
不敢妄冒陛下不棄菅蒯愛同絲麻儻平生之
言猶在聽覽宿心素志無復貳辭矜臣所乞特

迴寵命則彛章載穆微物知免臣今在假不容
詣省不任荷懼之至謹奉表以聞

爲蕭揚州作薦士表

任彥升

臣王言臣聞求賢暫勞垂拱未逸方之䟽壤取
類導川伏惟陛下道隱旒纒信充符璽六飛同
塵五讓高世白駒空谷振鷺在庭猶懼隱鱗卜
祝藏噐屠保物色關下委裘河上非取製於一
孤諒求味於兼采而五聲倦響九工是詢寢議
廟堂借聽輿阜臣位任隆重義兼家邦實欲使

名實不遠徼倖路絕勢門上品猶當格以清談
英俊下僚不可限以位貌竊見秘書丞琅邪臣
王暕年二十一字思晦七葉重光海內冠冕神
清氣茂允迪中和叔寶理遣之談彥輔名教之
樂故以暉映先達領袖後進居無塵雜家有賜
書辭賦清新屬言玄遠室邇人曠物踈道親養
素丘園台七階虛位庠序公朝萬夫傾望豈徒荀
令可想李公不亡而已哉前晉安郡侯官令東
海王僧孺年三十五理尚棲約思致恬敏既筆

耕爲養亦傭書成學至乃集螢映雪編蒲緝柳
先言往行人物雅俗甘泉遺儀南宮故事畫地
成圖祇掌可述豈直鼯鼠有必對之辯竹書無
落簡之謬暕坐鎮雅俗弘益已多僧孺訪對不
休質疑斯在並東序之秘寶瑚璉之茂器誠言
以人廢而才實世資臨表悚戰猶懼未允不任
下情

爲褚諮議秦讓代兄襲封表

任彥升

臣秦言昨被司徒符仰稱詔旨許臣允賁所請以臣襲封南康郡公臣門籍勲蔭光錫土宇臣賁世載承家允膺長德而深鑒止足脫屣千乘遂乃遠謬推恩近萃庸薄能以國讓弘義有歸匹夫難奪守以勿貳昔武始迫家臣之策陵陽感鮑生之言張以誠請丁爲理屈且先臣以大宗絕緒命臣出纂傍統稟承在昔理絕終天末惟情事觸目崩隕若使賁高延陵之風臣忘子臧之節是廢德舉豈曰能賢陛下察其冊款特

賜停絕不然投身草澤苟遂愚誠爾不任冊儀之至謹詣闕拜表以聞臣誠惶誠恐

爲范始興作求立太宰碑表

任彦升

臣雲言原夫存樹風猷沒著徽烈旣絕故老之口必資不刊之書而藏諸名山則陵谷遷賢府之延閣則青編落簡然則配天之迹存乎泗水之上素王之道紀於沂川之側由是崇師之義擬迹於西河尊主之情致之於堯禹故精廬安

啓必窮鑄勒之盛君長一城亦盡刊刻之美況
乎甄陶周召孕育伊顏故大宰竟陵文宣王臣
某與存與亡則義形社稷嚴天配帝則周公其
人體國端朝出藩入守進思必告之道退無苟
利之專五教以倫百揆時序若夫一言一行盛
德之風琴書藝業述作之茂道非兼濟事止樂
善亦無得而稱焉人之云亡忽移歲序鷓鴣東
徙松檟成行六府臣僚三藩士女人畜油素家
懷鉛筆瞻彼景山徒然望慕昔晉氏初禁立碑

魏舒之亡亦從班列而阮略旣泯故首冒嚴科
爲之者竟免刑戮置之者反蒙嘉歎至於道被
如仁功參微管本宜在常均之外故太宰淵丞
相疑親賢並軌卽爲成規乞依二公前例賜許
刊立寧容使長想九原樵蘇罔識其禁駐蹕長
陵轡軒不知所適臣里閭孤賤才無可甄值齋
網之弘弛賓客之禁策名委質忽焉二紀慮先
犬馬厚恩不荅而弊帷毀蓋未辱螻蟻珠襦玉
匣遽飾幽泉陛下弘獎名教不隔微物使臣得

駿奔南浦長號北陵既曲逢前施實仰覲後澤
儻驗杜預山頂之言庶存馬駿必拜之感臨表
悲懼言不自宣

文選卷第三十八終

文選卷第三十九

梁昭明太子蕭統撰

上書

上書秦始皇一首

李斯

臣聞吏議逐客竊以爲過矣昔者穆公求士西
取由余於戎東得百里奚於宛迎蹇叔於宋來
邳豹公孫支於晉此五子者不產於秦而穆公
用之并國三十遂霸西戎孝公用商鞅之法移

風易俗民以殷盛國以富彊百姓樂用諸侯親服獲楚魏之師舉地千里至今治彊惠王用張儀之計拔山川之地西并巴蜀北收上郡南取漢中包九夷制鄢郢東據成臯之險割膏腴之壤遂散六國之從使之西面事秦功施到今昭王得范雎廢穰侯逐華陽彊公室杜私門蠶食諸侯使秦成帝業此上四君皆以客之功由此觀之客何負於秦哉向使四君却客而不納踈士而不與是使國無富利之實而秦無彊大之

名也今陛下致崑山之玉有和氏之寶垂明月之珠服太阿之劍乘織離之馬建翠鳳之旗樹靈鯨之鼓此數寶者秦不生一焉而陛下悅之何也必秦國之所生然後可則夜光之璧不飾朝廷犀象之噐不爲玩好而趙衛之女不充後庭駿馬馱馱不實外廐江南金錫不爲用蜀之丹青不爲采所以飾後宮充下陳娛心意悅耳目者必出於秦然後可則是宛珠之簪傅璣之珥阿縞之衣錦繡之飾不進於前而隨俗雅化

佳冶窈窕趙女不立於側也夫擊甕扣缶彈箏
搏髀而歌嗚嗚快耳者真秦之聲也鄭衛桑間
韶虞武象者異國之樂也今棄擊甕而就鄭衛
退彈箏而取韶虞若是者何也快意之當前適
觀而已矣今取人則不然不問可否不論曲直
非秦者去爲客者逐然則是所重者在乎色樂
而所輕者在乎民人此非所以跨海內制諸侯
之術也臣聞地廣者粟多國大者人衆兵彊者
則士勇是以泰山不讓土壤故能成其大河海

不擇細流故能就其深王者不却衆庶故能明
其德是以地無四方人無異國四時充美鬼神
降福此五帝三王之所以無敵也今乃弃黔首
以資敵國却賓客以業諸侯使天下之士退而
不敢西裹足不入秦此所謂藉寇兵而齎盜糧
者也夫物不產於秦可寶者多士不產於秦願
忠者衆今逐客以資敵國損民以益讐言內自虛
而外以樹怨諸侯求國無危不可得也

上書吳王一首

鄒陽

臣聞秦倚曲臺之宮懸衡天下畫地而人不犯
兵加胡越至其晚節末路張耳陳勝連從兵之
據以叩函谷咸陽遂危何則列郡不相親萬室
不相救也今胡數涉北河之外上覆飛鳥下不
見伏兔鬪城不休救兵不止死者相隨輦車相
屬轉粟流輸千里不絕何則疆趙責於河間六
齊望於惠后城陽顧於盧博三淮南之心思墻
墓大王不憂臣恐救兵之不專胡馬遂進窺於
邯鄲越水長沙還舟青陽雖使梁并淮陽之兵

下淮東越廣陵以遏越人之糧漢亦折西河而
下北守漳水以輔大國胡亦益進越亦益深此
臣之所爲人王患也臣聞蛟龍驤首奮翼則浮
雲出流霧雨咸集聖王砥節脩德則游談之士
歸義思名今臣盡智畢議易精極慮則無國而
不可干飾固陋之心則何王之門不可曳長裾
乎然臣所以歷數王之朝皆淮千里而自致者
非惡臣國而樂吳民也竊蒿下風之行尤說大
王之義故願大王無忽察聽其至臣聞鷙鳥累

百不如一鶚夫全趙之時武力鼎士衺服叢臺
之下者一旦成市不能止幽王之沈患淮南山
東之俠死士盈朝不能還厲王之西也然則計
議不得雖諸貴不能安其位亦明矣故願大王
審畫而已始孝文皇帝據關入立寒心銷志不
明求衣自立天子之後使東牟朱虛東襄儀父
之後深割嬰兒王之壤子王梁代益以淮陽卒
什濟比囚弟於雍者豈非象新垣等哉今天子
新據先帝之遺業左規山東右制關中變權易

勢大臣難知大王弗察臣恐周鼎復起於漢新
垣過計於朝則我吳遺嗣不可期於世矣高皇
帝燒棧道灌章邯兵不畱行收敵人之倦東馳
函谷西楚大破水攻則章邯以亡其城陸擊則
荆王以失其地此皆國家之不幾者也願大王
熟察之

於獄上書自明一首

鄒陽

臣聞忠無不報信不見疑臣常以爲然徒虛語
耳昔者荆軻慕燕丹之義白虹貫日太子畏之

衛先生爲秦畫長平之事太白蝕昴昭王疑之
夫精誠變天地而信不論兩主豈不哀哉今臣
盡忠竭誠畢議願知左右不明卒從吏評爲世
所疑是使荆軻衛先生復起而燕秦不悟也願
大王熟察之昔者玉人獻寶楚王誅之李斯竭
忠胡亥極刑是以箕子佯狂接輿避世恐遭此
患也願大王察玉人李斯之意而後楚王胡亥
之聽無使臣爲箕子接輿所笑臣聞比干剖心
子胥鴟夷臣始不信乃今知之願大王熟察少


加憐焉語曰白頭如新傾蓋如故何則知與不
知也故樊於期逃秦之燕藉荆軻首以奉卅之
事王奢去齊之魏臨城自剄以却齊而存魏夫
玉奢樊於期非新於齊秦而故於燕魏也所以
去二國而死兩君者行合於志而慕義無窮也
是以蘇秦不信天下爲燕尾生白圭戰亡六城
爲魏取中山何則誠有以相知也蘇秦相燕人
惡之於燕王燕王按劍而怒食以駃騠白圭顯
於中山中山人惡之於魏文侯文侯投以夜光

之璧何則兩主一臣剖心析肝相信豈移於浮
詞哉故女無美惡入宮見妬士無賢不肖入朝
見嫉昔者司馬喜臏脚於宋卒相中山范雎摺
脇折齒於魏卒爲應侯此二人者皆信必然之
畫捐朋黨之私挾孤獨之交故不能自免於嫉
妬之人也是以申徙狄蹈雍之河徐衍負石入
海不容身於世義不苟取比周於朝以移人主
之心故百里奚乞食於道路繆公委之以政審
滅飯牛於車下而桓公任之以國此二人者豈

素宦於朝借譽於左右然後二主用之哉感於
心合於意堅如膠漆昆弟不能離豈惑於衆口
哉故偏聽生姦獨任成亂昔魯聽季孫之說逐
孔子宋信子冉之計囚墨翟夫以孔翟之辯不
能自免於讒諛而二國以危何則衆口鑠金積
毀銷骨是以秦用戎人由余而霸中國齊用越
人子臧而疆威宣此二國豈拘於俗牽於世繫
奇偏之辭哉公聽並觀垂名當世故意合則胡
越爲昆弟由余子臧是也不合則骨肉爲讐敵

朱象管蔡是也今人主誠能用齊秦之明後宋魯之聽則五伯不足侔而三王易爲比也是以聖王覺悟捐子之之心而不說田常之賢良封比干之後脩孕婦之墓故功業覆於天下何則欲善無厭也夫晉文公親其讎而彊霸諸侯齊桓公用其仇而一匡天下何則慈仁殷勤誠加於心此不可以虛辭借也至夫秦用商鞅之法東弱韓魏立彊天下而卒車裂之越用大夫種之謀禽勁吳而霸中國遂誅其身是以孫叔敖

一去相而不悔於陵子仲辭三公爲人灌園今人主誠能去驕傲之心懷可報之意披心腹見情素隳肝膽施德厚終與之窮達無愛於士則桀之犬可使吠堯而跖之客可使刺由何況因萬乘之權假聖王之資乎然則荆軻沈七族要離燔妻子豈足爲大王道哉臣聞明月之珠夜光之璧以暗投入於道路衆莫不按劍相眄者何則無因而至前也蟠木根柢輪困離奇而爲萬乘器者何則以左右先爲之容也故無因而



原件短缺

P9

至前雖出隨侯之珠夜光之璧祇足結怨而不見德故有人先談則枯木朽株樹功而不忘今天下布衣窮居之士身在貧賤雖蒙堯舜之術挾伊管之辯懷龍逢比干之意欲盡忠當世之君而素無根柢之容雖竭精神欲開忠信輔人主之治則人主必襲按劍相眄之跡矣是使布衣之士不得爲枯木朽株之資也是以聖王制世御俗獨化於陶鈞之上而不牽乎卑辭之語不奪乎衆多之口故秦皇帝任中庶子蒙嘉之

木朽株盡爲難矣是胡越起於穀下而羗夷接軫也豈不殆哉雖萬全無患然本非天子所宜近也且夫清道而後行中路而馳猶時有銜檝之變而况乎涉豐草騁丘墟前有利獸之樂而內無存變之意其爲害也不亦難矣夫輕萬乘之重不以爲安而樂出萬有一危之塗以爲娛臣竊爲陛下不取也蓋聞明者遠見於未萌而智者避危於無形禍故多藏於隱微而發於人所忽者也故鄙諺曰家累千金坐不垂堂此言

雖小可以喻大臣願陛下留意幸察

上書諫吳王

枚叔

臣聞得全者昌失全者亡舜無立錐之地以有天下禹無十戶之聚以王諸侯湯武之士不過百里上不絕三光之明下不傷百姓之心者有王術也故父子之道天性也忠臣不避重誅以置直諫則事無遺策功流萬世臣乘願披心腹而效愚忠惟大王少加意念惻怛之心於臣乘言夫以一縷之任係千鈞之重上懸之無極之高下垂之不測之淵雖甚愚之人猶知哀其將絕也馬方駭故而驚之係方絕又重鎮之係絕於天不可復結墜入深淵難以復出其出不出間不容髮能聽忠臣之言百舉必脫必著所欲爲危於累卵難於上天變所以欲爲易於反掌安於泰山今欲極天命之上壽敝無窮之樂究萬乘之勢不出反掌之易居泰山之安而欲乘累卵之危走上天之難此愚臣之所大惑也人性有畏其景而惡其迹却背而走迹逾多景逾

高下垂之不測之淵雖甚愚之人猶知哀其將絕也馬方駭故而驚之係方絕又重鎮之係絕於天不可復結墜入深淵難以復出其出不出間不容髮能聽忠臣之言百舉必脫必著所欲爲危於累卵難於上天變所以欲爲易於反掌安於泰山今欲極天命之上壽敝無窮之樂究萬乘之勢不出反掌之易居泰山之安而欲乘累卵之危走上天之難此愚臣之所大惑也人性有畏其景而惡其迹却背而走迹逾多景逾

疾不如就陰而止景滅迹絕欲人勿聞莫若勿
言欲人勿知莫若勿爲欲湯之滄一人炊之百
人揚之無益也不如絕薪止火而已不絕之在
彼而救之在斯譬由抱薪而救火也養由基楚
之善射者去楊葉百步百發百中楊葉之大加
百中焉可謂善射矣然其所止乃百步之內耳
比在臣乘未知操弓持矢也福生有基禍生有
胎納其基絕其胎禍何自來哉泰山之霽穿石
殫極之紈斷榦木非石之鑽索非木之鋸漸靡

使之然也夫銖銖而稱之至石必差寸寸而度
之至丈必過石稱丈量徑而寡失夫十圍之木
始生而蘖足可搔而絕手可擢而拔據其未生
先其未形也磨礮砥礪不見其損有時而盡種
樹畜養不見其益有時而大積德累行不知其
善有時而用棄義背理不知其惡有時而亡臣
願王熟計而身行之此百代不易之道也

上書重諫吳王

枚叔

昔秦西舉胡戎之難北備榆中之關南距羌笮

之塞東當六國之從六國乘信陵之藉明蘇秦
之約厲荆軻之威并力一心以備秦然秦卒禽
六國滅其社稷而并天下者何也則地利不同
而民輕重不等也今漢據全秦之地兼六國之
衆脩戎狄之義而南朝羌笮此其與秦地相什
而民相百大王之所明知也今夫讒諛之臣爲
大王計者不論骨肉之義民之輕重國之小大
以爲吳禍此臣所以爲約大王患也夫舉吳兵以
訾於漢譬猶蠅蚋之附群牛腐肉之齒利劍鋒

接必無事矣天下聞吳率失職諸侯願責先帝
之遺約今漢親誅其三公以謝前過是大王之
威加於天下而功越於湯武也夫吳有諸侯之
位而富實於天子有隱匿之名而居過於中國
夫漢并二十四郡十七諸侯方輸錯出軍行數
千里不絕於郊其珍怪不如山東之府轉粟西
向陸行不絕水行滿河不如海陵之倉脩治上
林雜以離宮積聚玩好園守禽獸不如長洲之
苑游曲臺臨上路不如朝夕之池深壁高壘副

以關城不如江淮之險此臣之所以大王樂也
今大王還兵疾歸尚得十半不然漢知吳之有
吞天下之心赫然加怒遣羽林黃頭循江而下
襲大王之都魯東海絕吳之饗道梁王飾車騎
習戰射積粟固守以備滎陽待吳之饑大王雖
欲反都亦不得已夫三淮南之計不負其約齊
王殺身以滅其迹四國不得出兵其郡趙囚邯
鄲此不可掩亦已明矣今大王已去千里之國
而制於十里之內矣張韓將北地弓高宿左右

兵不得下壁軍不得太息臣竊哀之願大王熟
察焉

詣建平王上書

江文通

昔者賤臣叩心飛霜擊於燕地庶女告天振風
襲於齊臺下官每讀其書未嘗不廢卷流涕何
者士有一定之論女有不易之行信而見疑貞
而爲戮是以壯夫義士伏死而不顧者此也下
官聞仁不可恃善不可依謂徒虛語乃今知之
伏願王暫停左右少加憐察下官本蓬戶桑樞

之人布衣韋帶之士退不飾詩書以驚愚進不
買名聲於天下日者謬得升降承明之闕出入
金華之殿何嘗不局影凝嚴側身局禁者乎竊
慕大王之義復爲門下之賓備鳴盜淺術之餘
豫三五賤伎之末大王惠以恩光顧以顏色實
佩荆卿黃金之賜竊感豫讓國士之分矣常欲
結纓伏劔少謝萬一剖心摩踵以報所天不圖
小人固陋坐貽謗缺迹墜昭憲身限幽圜履影
弔心酸鼻痛骨下官聞虧名爲辱虧形次之每

以一念來忽若有遺加以涉旬月迫季秋天光
沈陰左右無色身非木石與獄吏爲伍此少卿
所以仰天槌心泣盡而繼之以血者也下官雖
乏鄉曲之譽然嘗聞君子之行矣其上則隱於
簾肆之間卧於巖石之下次則結綬金馬之庭
高議雲臺之上退則虜南越之君係單于之頸
俱啓丹冊並圖青史寧當爭分寸之末競錐刀
之利哉下官聞積毀銷金積譏磨骨遠則直生
取疑於盜金近則伯魚被名於不義彼之二子

猶或如是況在下官焉能自免昔上將之眦絳
侯幽獄名臣之羞史遷下室至如下官當何言
哉夫以魯連之智辭祿而不返接輿之賢行歌
而忘歸子陵閉關於東越仲蔚杜門於西秦亦
良可知也若使下官事非其虛罪得其實亦當
鉗口吞舌伏七首以殞身何以見齊魯竒節之
人燕趙悲歌之士乎方今聖曆欽明天下樂業
青雲浮洛榮光塞河西洎臨洮狄道北距飛狐
陽原莫不浸仁沐義昭景飲醴而下官抱痛圓

門含憤獄戶一物之微有足悲者仰惟大王少
垂明白則梧丘之冤不愧於沈首鵠亭之鬼無
恨於灰骨不任肝膽之切敬因執事以聞

啓

奉荅勅示七夕詩啓

任彥升

臣昉啓奉勅示七夕五韻竊惟帝迹多緒
俯同不一託情風什希世罕工雖漢在四世魏
稱三祖寧足以繼想南風克諧調露性與天道
事絕稱言豈其多幸親逢旦暮臣早奉龍潛與

賈馬而入室晚屬天飛比嚴徐而待詔惟君知
臣見於訥言之旨取求不疵表於辯才之戲謹
輒牽率庸陋式謝天獎拙速雖效蚩鄙已彰臨
啓慙慙罔識所實謹啓

爲卞彬謝脩卞忠貞墓啓

任彥升

臣彬啓伏見詔書并鄭義恭宣勅當賜脩埋臣
亡高祖晉故驃騎大將軍建興忠貞公壺墳塋
臣門緒不昌天道所昧忠構身危孝積家禍名

教同悲隱淪惆悵而年世貿遷孤裔淪塞遂使
碑表蕪滅丘樹荒毀孤兔成穴童牧哀歌感慨
自哀日月纏迫陛下弘宣教義非求效於方今
壺餘烈不泯固陳力於異世但加等之渥近闕
於晉典樵蘇之刑遠流於皇代臣亦何人敢謝
斯幸不任悲荷之至謹奉啓以聞謹啓

上蕭太傅固辭奪禮啓 任彥升

昉啓近啓歸訴庶諒窮款奉被還旨未垂哀察
悼心失圖泣血待旦昉於品庶示均鎔造干祿

祈榮更爲自拔虧教廢禮豈關視聽所不忍言
具陳茲啓昉往從末宦祿不代耕飢寒無甘旨
之資限役廢晨昏之半膝下之歡已同過隙几
筵之慕幾何可憑且奠酌不親如在安寄晨暮
寂寥間若無主所守既無別理窮咽豈及多喻
明公功格區宇感通有塗若霈然降臨賜寢嚴
命是知孝治所被爰至無心錫類所及匪徒教
義不任崩迫之情謹以啓事陳聞謹啓

文選卷第三十九 終

音釋

鞅在兩馱偃從容織息鯁徒馱決馱啼死在縞占
甕在缶甫髀陛齋資從容輸去易亦鷲至袷縣
剽古馱決馱啼析昔臄鼻摺拉雍平跖隻抵蒂
奇衣砥止檝渠滄楚雷力搔先難去從容蚘而
腐輔輸去圈奇饗失槌直蔚尉洮七恧女酌外

Vertical columns of faded Chinese text on the right page.

Main vertical columns of faded Chinese text on the right page.



